

BERNA

Finizun dal «Barat quadriling»
en la Chasa federala

Quatter classes da scola cun totalmain 71 scolares e scolars da Mustér, Appenzell (Appenzell Dadens), Acquarossa (Tessin) e Cressier (Neuchâtel) èn sa participadas a l'emprim «Barat quadriling» che ha gi lieu questa primavaira a Mustér. Dals 8 fin ils 12 da matg 2023 han las scolares ed ils scolars gi la chaschun da s'approfondar en las quatter linguas naziunales e d'augmentar la chapientscha per las autras cuminanze linguistics. La finizun dal champ ha gi lieu ils 9 da zercladur 2023 a Berna.

Barat linguistic e cultural

Martin Candinas, il president dal Cussegl naziunal, ha retschavì las scolares ed ils scolars en la Chasa federala ed als ha dà in'invista en il manaschi politic da la Svizra plurilingua. Cun chanzuns en las quatter linguas naziunales han ils uffants laschè reviver las regurdientschas al champ a Mustér e festivà la finizun da l'emprim «Barat quadriling». Quel è vegnì organisà da la Lia Rumantscha sin iniziativa da Martin Candinas e cun sustegn da l'agentura naziunala Movetia. I sa tracta d'in concept per il barat linguistic e cultural che includa tut las quatter linguas naziunales. Il format duai cuntinuar ils proxims onns. (cdm/fmr)



La finizun dal «Barat quadriling» ha gi lieu en Chasa federala.

FOTO LIA RUMANTSCHA/MONIKA FLÜCKIGER

VAL CALANCA

Inaugurà ovra idraulica ad Arvigo

Venderdi è vegnida inaugurada en la Val Calanca ina ovra electrica pitschna che producescha forza electrica per radund 1100 chasadas. Ella nizzegia la differenza d'autezza da var 700 meters tranter la confluenza dal Rià di Arvigo ed il Rià della Pianca fin il vitg d'Arvigo. La societad gestiunaria Idro Arvigo SA sa cumpona dal concern d'energia BKW, che posseda passa 95% da las aczias e da la vischnanca da Calanca. Tenor comunicaziun da la BKW han las lavurs da construcziun durà dus onns. L'entir project haja custà enturn 12 milliuns francs. (rtr/fmr)

LA CIFRA DAL DI

19978 delicts

L'onn 2022 ha la polizia registrà 19978 delicts en il sector chasan en Svizra (2021: 19341); quai è in augment da 3,3% en cumparegliazun cun l'onn precedent (+637 delicts). Tenor Uffizi federal da statistica sa cumponan ils delicts ils pli frequents registrads da la polizia suandantamain: Malfates (33%), smanatschas (20%), insultaziuns (19%) e lesiun corporala simpla (11%). Dapi l'onn 2009 èn questas valurs relativamain stabilas. (fmr/sab)

Viadi presidial è a fin

En il center da la radunanza generala da la Viafier retica a Casti è stà il cumià da Stefan Engler sco president dal cussegl d'administraziun. El haja gronds merits per il svilup dal manaschi ed er dal traffic, è vegnì ditg pliras giadas durant la radunanza generala.

GION NUTEGN STGIER/FMR

La raschun che la 135avla radunanza generala da la Viafier retica è stada a Casti è che Stefan Engler ha manà quella per la davosa giada sco president dal cussegl d'administraziun. Dalla partida èn stads venderdi passà 380 acziunaris ed acziunarias. El sa chattia fitg onurà da pudair salvar sia ultima radunanza generala sco parsura dal cussegl administrativ da la Viafier retica en sia vischnanca. Cun crescher si a Surava, bunamain d'asper il binaris dalla Viafier retica, saja el fin oz adina stà fascinà ed entusiasma da quella, ha ditg. Suentar 24 onns commember dal cussegl d'administraziun e da quels 12 onns e mez president da quel gremi saja ussa per el a fin il viadi presidial. In viadi fitg interessant, plain tensiun, cun numerusas e bellas entupadas, cun ina direcziun empernaivla e cun 1500 collavuratur e collavuraturas motivads e motivadas, ha punctuà Engler.

Daventa successur da Hans-Jürg Spillmann

Suentar esser stà 12 onns commember dal cussegl d'administraziun è Engler vegnì elegi il 2010 sco president da quest gremi e successur da Hans-Jürg Spillmann. Acziunaris ed acziunarias han gi cun quai tar el fidanza cumplaina sco manader strategic da la Viafier retica. En quels 24 onns sco commember e president dal cussegl d'administraziun ha l'um da Surava lavurà ensemen cun quatter directurs da la Viafier retica. Quai èn: Silvio Fasciati, Erwin Rutishausser, Hans Amacker e Renato Fasciati, dapi il 2015 CEO da quest manaschi. Sco successur dal president partent e sco nov parsura dal cussegl administrativ da la Viafier retica han ils preschents e las preschentas elegi Mario Cavigelli, l'antierur cusseglier guvernativ. El surpiglia quest mandat cun plaschair, engaschi e plain speranza, ha el ditg suenter la sia elecziun.

Intginas culminaziuns

En quels 24 onns sco commember dal cussegl d'administraziun da la Viafier retica e president



Il president dal cussegl d'administraziun partent (da san.) Stefan Engler surdat ses uffizi a Mario Cavigelli.

FOTO ANDY METTLER

da quella giunta ha Engler gi intginas culminaziuns grazia a la viafier. Per exempel il 2008, l'onn che la lingia da viafier da l'Avra e dal Bernina ha retschet il label da l'UNESCO, dus onns suenter il battaisem dals novs trens «Allegra» ed il medem onn er il giubileum da 100 onns dal trajet da la viafier sur il Bernina. Il 2014 lura il punct culminant cun las festivitads da 125 onns da la Viafier retica en plirs lieus e staziuns. Quel onn alura, ils 14 d'avust, è Engler er stà ina da las emprimas persunas ch'è stada al lieu da l'accident da tren en la vischnanza da Casti, per el in accident ch'è i fitg a cor e che ha er chaschunà d'olur al president. Dus onns pli tard ha el surdà a Tusaun al traffic ils novs trens «Alvra» ed il 2018 è stada a la fin d'october la perforaziun dal nov tunnel da l'Alvra. Ultra da quai è Engler era vegnì a pled il 2019 tar la festa da 20 onns tunnel dal Vereina.

Rait politica da gronda valur

Daniel Albertin, il president da la vischnanca d'Alvra/Alvra ha ditg ch'el saja engraziavel che la situaziun da Brinzauls fatschenta ferm la

populaziun da l'entira regiun, dal chantun ed era da tut la Svizra. In plaschair saja lura d'avair cun la Viafier retica en sia vischnanca er ina chausa plaschaivla en quel temp plain malsegurezza ed intschert. Ella na colliescha betg mo lieus, na, ella colliescha er istorgias. Tarzisius Caviezel, il president dal Cussegl grond ha ditg che la Viafier retica ed er l'entir manaschi haja profità ferm da la rait politica d'Engler. Sia savida giuridica saja er stada per il cussegl administrativ da la Viafier retica ina gronda valur, in immens gudogn ed in enritgiment instancabel, ha accentuà Caviezel.

Engler na saja betg be stà in president fidà, el saja er stà in bun ami ed in mentur da bun exempel. Cusseglia governativa Carmelia Maissen ha er engrazià ad Engler per sia lavur perseveranta. Ella saja er vegnida a Casti per mussar la stima da la regenza e da l'entir chantun envers la Viafier retica. In travagl che saja da gronda impurtanza per la mobilitad en il Grischun. Ils affars statutarics èn vegnids acceptads senza discussiuns pli grondas. L'onn da gestiun 2022 ha la Viafier retica terminà cun in gudogn da 4,2 milliuns francs.

CUPPA MUNDIALA BIKE

In di istoric a Lai

Questa fin d'emna han gi lieu diversas cursas da bike da la cuppa mundiala a Lai. Punct culminant ed istoric: la 34avla victoria dal matador local Nino Schurter. Il Lumnezian è grazia a questa victoria sulet recordist en la cuppa mundiala da cross-country.


Avant radund in onn ha il biker Nino Schurter (37) cun sia 33avla victoria en la disciplina da cross-country egualisà il record da Julien Absalon. Dapi questa dumengia è el sulet recordist. Precis tar sia probablmain davosa cursa a chasa a Lai gudogna el per la 34avla giada ina cursa da cross-country en la cuppa mundiala.

«Paraula perfetga»

Gia baud è il Lumnezian sa distanzià da la concurrenza ed è i a la testa a Lai. Cun 15 secundas avantatg è el vegnì la finala sur la lingia d'arrivada. I saja la «paraula perfetga» ha Nino Schurter ditg curt suenter la cursa envers SRF. Davant ils fans a chasa, quai haja dà energia uschia ch'el haja anc ina giada pudì dar tut. Sche quai saja ussa il punct culminant en sia carriera na sappia el betg anc dir, el dovria anc dus u trais dis, ha el ditg vinavant. Per recapitular: Aur, argent e bronz a gieus olimpics, diesch titels da campioni mundial, otg giadas gudagnà il classament general da la cuppa mundiala, ed ussa pia 34 victorias en la cuppa mundiala – uschia la statistica. La cursa da short track da venderdi aveva Schurter terminà be sco 16avel, el era vegnì bittà per terra tar la cursa. Meglier èsi i cun Vital Albin, l'auter mountainbiker da Tersnaus, en il short track. El è vegnì novavel. Ed era en la cursa da cross-country da dumengia ha el mussà ina buna prestaziun cun vegnir quindeschavel.

Suraspresas e victorias svizras

Ultra da la victoria sorprendenta da Nino Schurter hai dà per la squadra svizra er uschi-gio intginas surpresas e victorias. En la cursa da cross-country da las dunnas è Alexandra Keller vegnida terza, quai grazia ad ina gron-



Nino Schurter cun sia figlia Lisa durant l'undrientscha dals victurs a Lai.

FOTO MAXIME SCHMID/KEYSTONE

diasa finizun. Gia en la cursa da short track era la Sutsilvania vegnida segunda. Camille Balanche da Neuchâtel è vegnida segunda en la disciplina da downhill ch'ha lieu sonda.

Bunas prestaziuns tar las atletas ed ils atlets sut 23 onns

Gist en l'emprima cursa (short track) hai dà gievgia ina victoria dubla svizra per las dunnas

sut 23 onns, quai cun Ronja Blöchlinger sco victura e Ginia Caluori da Panaduz sin il segund plaz.

Er en la cursa da short track dals umens U23 hai dà ina victoria svizra cun Dario Lillo. L'actual campioni svizzer dals umens sut 23 onns ha era gudagnà la cursa da cross-country da dumengia. E tar las dunnas è Ronja Blöchlinger vegnida segunda. (rtr/fmr)